

■ DIS DA LITTERATURA

Odissea

DA RICO VALÄR

Sabato 16 giugno 2007. Allarme caldo in tutta Italia. Le temperature massime percepite nelle 17 città osservate si assestano tutte al di sopra dei 32 gradi. E oggi sarà anche peggio, con la colonna di mercurio che salirà abbondantemente. Genova 34 gradi.

El bitta la gasetta en il chanaster. Tge chaliras, gia uschè baud la damaun! Guardond enturn sa ristga Flurin or en las giassas stretgas da la citad veglia, cun in cudesch ed ina regurdanza. Tgi sa sche jau la chat? Las giassas èn gia fullanadas. Sco adina: per las Talianas èn ils passapes sco las passarellas da Milaun e Paris. Ils chavels cotschens s'imaginescha el be. En las vaidrinassas sa spievlan ils passants. Jau ma plasch oz, vesas or giuven ed attractiv. Tutto 50%. Saldi. Guardar na custa nagut. Dai, giovanotto, entri, ho delle belle scarpe. Grazie, no. Anc ina giada contempla el ses reflex. Pover Narciss. Sche jau na la chat betg ma bit jau en in lai da vaider. Tge saira che nus avain passentà, tge notg... L'emprima egliada è stada sco dus furadas d'in stilet, ina en l'egl, l'otra en la charn.

Flurin sua sa regurdond. La citad sua sut il sulegl mediterranean. Las salatas sin las maisas dals martgads pendan, e las battarias dals batmans cumbattants paran d'ir al main. Las mustgas giudan. Ils bankers portan flatgs stgirs enturn culiez e sut las spatlas. Las sumbrivas daventan adina pli pitschnas. Tut daventa quiet, para petrifitgà. Flurin erra tras citad. Era Columbus è errà. Era el en tshertga, era el chatschà. San Lorenzo è anc tut frestg, almain qua in refugi.

Meis cour rafüda da batter. Our dal s-chür am tshütтан fantoms. Mias algordanzas sun linguas da fö illa spessüra dal god. Sch'eu tillas stendschaint in ün lö, sflamgian ellas sü in ün oter, e tuot es viv e preschaint. Tut era gia decis cur che nus vain cumenzà a ballar, la fin era nudada en l'entschatta. Il saut è daventà vi e pli balurd, l'otra glied è sblatgida, mo nus dus eran reals en nossa illusiun.

El serra il cudesch. Turmentà da regurdanzas, da desideris, cumpara el pupè sut il portal da la catedrala. Il sulegl arda e tshorventa. Il tamfisch al chatscha il suaditsch or da la pel. Tu es belle comme une prison qui brûle! Gnanc dals vegls edifizis n'han els respect, ils sprayers. Elena, nua es ti? Jau na pos pli. Jau na pos betg emblidar tes chavels cotschens fie, tes lungs dets fins charezzan mia memoria, tes egl verd clers sa fitgan en mes patratgs. Dunnas felinas cun chavels cotschens



lungs, sco giats d'arom, jau las ves d'aper tut. Eu sun ün chatschader chatschà da las furias. Eu am dost e cumbat.

Ta regordas era? Fuoco nel fuoco sono gli occhi tuoi dentro i miei, ne basta poco ed ho già capito chi sei e che cosa cerchi tu da me. La notte sembra perfetta per consumare la vita, io e te. Eros. Jau sent anc tia odor da nus ch tropicala, tes flad chaud, tes suspirs regnids. E lura, simplamain sparida. Ina terza furada, questa giada hai fatg mal.

Es ti en tshertga dal proxim butin, ni es chatschada dad Irus e ses cumpogns? Co vegn ad esser mes return? La speranza blu. Sesì en la bar baiva Flurin in Malibu suenter l'auter. Quest gust sveglia regurdanzas. Memia bellas per betg far mal. Mo'l giat cotschen as palainta amo adüna. E cur ch'eu am ferm aint il s-chür, am struscha' in tuorn mias chammas e fila.

Tras giassas illuminadas chamina el fin al port. Davant el il vast orizont. Sche jau pudess be sfundrar en il blau nair e ma perder. En la lingua stgira da l'orizont pertschaiva el ina siluetta, la sumbriva d'ina persuna che sesa a la fin da la punt da sbartgar, insatgi che crida. Sia lieunga daventa sitga. Ils channels da las larmas era. Las stailas paran d'esser cru-dadas en l'ocean. El dat il dies al mar impenetrabel e turna vers il port. Odissea di Mercurio. Tge num per ina nav. Cun in piter gust da cocos sin las levzas ed in singular palpar sin la pel sa tshenta el a la riva. Curius, jau na ves betg mes reflex en l'aua naira. Anc ina giada sa volva el vers la siluetta. N'è quai betg in giat che scappa là vers las bartgas? E sch'i na giess gnanc per turnar? Siamo fuoco nel fuoco, ormai bruciamo in fretta noi...